

# Psalm de penitenzia

Autor(en): **Derungs, Ursicin G.G.**

Objektyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **66 (1981)**

Heft 16

PDF erstellt am: **30.06.2024**

Persistenter Link: <https://doi.org/10.5169/seals-882232>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

# Psalm de penetienza

da Ursicin G.G. Derungs

Cu ils carrs armai de Hitler  
rumplanavan ella Pologna,  
dumandavan ins en nos confessiunals:  
«Persuls? Ni cun auters?»  
Sela.\*

E cu ils gedius  
vegnevan spogliai da lur vestgadira  
e tarmess ellas combras de gas  
ad Auschwitz,  
eran ils pasturs dellas olmas en quitaus  
pervia dellas mongias cuortas  
ed ils caltscheuls transparents  
dellas femnas,  
ed ils cudischs de historia  
ludavan il holocaust  
commess dals cavaliers cristians  
a Jerusalem mellienavontanov.  
Sela.

E tgei vevan ils catechissems de dir  
della fom  
finanziada da nossa beinstonza? –  
Tgei products de Maggi e Knorr  
ch'il cartent astgi duvrar  
il venderdis!  
Sela.

\* L'interjecziun «sela» regorda als psalms biblics. Tgei ch'ella significhescha ei buca dil tut clar, forsa in «refrain», forsa in clom da dolor. En quei text po quella muntada prevaler, lu la regurdientscha als psalms biblics e la finala in cert aspect enigmatic.

Cu igl imperialissem american  
empruava ora novas armas  
el Vietnam,  
vein buc ils biars de nus cartiu  
che quei seigi schi normal  
sco de stiarner Neocid encunter insects,  
ni sco igl ei normal ch'ins hagi fom ellas Indias  
ed avunda de magliar tier nus?  
Sela.

E ferton che la Cambogia  
miera,  
essan nus en quitaus,  
schebein il secretari della Ligia Romontscha  
stoppi esser de messa ni de priedi.  
Sela.

En El Salvador vegn la gliued dil sempel pievel  
extirpada sco vermaneglia,  
mazzada per vias e campagnas  
cun armas americanas  
dals paucs rehs  
che partan lur interess cun las multinaziunalas.  
Novmelli morts igl onn otgonta!  
E de quella regenza fan era  
cristiandemocrats part.  
Han nos cristiandemocrats protestau?  
A nus emporta ei nuot  
che Reagen hagi gia empermess  
depli raps e depli armas a quels hentgers,  
sco ei empurtava nuot  
ch'il pluriassassin e lader en grond stil  
Reza Pahlevi  
ha astgau haver sia vella en nies miez.  
Sela.

En tgei martirologi  
vegnan ils marters  
dils regims militars menziunai  
ed ils trentamelli spari

ell'Argentina numnai?  
En tgei processiuns vein nus demonstrau  
per ils perschuniers de Thieu  
serrai els casets de tighers?  
Igl uestg Romero ei morts  
en sia catedrala,  
mazzaus da maun faschist,  
perquei ch'el ha plidau  
encunter la repressiun dils campesinos.  
Nus denton rughein per bial'aura  
e vocaziuns spiritualas.  
Nus rughein per pasch,  
mo nus cartein en la pasch  
de Nixon e Kissinger.  
Sela.

Nus havein buca piars la cunscienza,  
Nus havein mai giu ina! Sela.

Nus essan mai stai el bugl della historia  
ed els freids serenezis de novas damauns. Sela.

En historia han ei fatg tschocs nus per la historia,  
ei han dau en la dorma a nus  
e fatg lischiva cun nos tschurvials,  
per che nus haveien egls,  
mo veseien buc,  
e tschurvials,  
mo dubiteien buca dellas verdads officialas. Sela.

Aschia stein nus avon tei:  
Innocents sco animals,  
senza puccaus e senza vertids,  
nutri cun pulenta e pregiudezis,  
humiliai sco bovs sut il giuv. Sela.

Nossas eucaristias ein daventadas  
fiastas senza penetienza e senza memoria.  
Brutalmein bialas.  
Amen.